



Fasnacht 2010

Alles im Griff uff em singende Schiff ?

Es griiblet schyyns dr Grüübel vor sich aane, soo wie dr Ospel synerzyt als gosplet het. Was usekunnt derbyy loosst sich eraane: dr Aggzionäär luegt yy, doo gilt e jeedi Wett. S nimmt d UBS vom Bund zwoor gäärn die Myliaarde - wo aigedig em braave Schwyzer gheere - ass s Bangggeschäft ka duurestaarte aber niemerts will de Bängger Mores leere.

Nadyrlig het men alles fescht im Griff uff dämm havarierte, legge, singende Schiff.

D UBS droot mit em Uuszug uus dr Schwyz, wenn d Gsetz nid em Banggen-Ego aabasst wääre. No immer sitzt im Bänggerhiimi Gyyr und Gyz und d liberzyygig ass d Booni s Salz sin uf dr Äärde. Zem s Bangg-Gschäft rette git me d Date vo de Kunde, nadyrlig ooni z frooge, diräggt ans Gricht in d USA und kaa esoo die aigne Schulde stunde; e smarte Bängger verdient au doo no draa. Hauptsach isch - und das isch s Beschte - me kaa s gwoont brotzig Lääbe wyterfiere. Zwoor gälte Gsetz graad wie im Wilde Weschte, doch wäär gedraut sich scho in dääre Gille z riere?

Nadyrlig het men alles fescht im Griff uff dämm havarierte, legge, singende Schiff.

Au s Banggeghaimnis losst me bletzlig sause, was hailig und tabuu gsi isch, isch jetz vom Disch und uus de Bängger wärde iiber Nacht Banause, wil halt Bedruug und Hinterzieig s glyychen isch. Kuum foot doo Ain im Noorde afo d Geissle schwinge und droot mit em Ymarsch vo dr Kavallerie, no längt das scho zum unseri Regierig zwinge - und scho isch s mit em Banggghaimnis verbyy. Dr Bundesroot niggt undertäänigscht mit em Kepfli, wenn d Bängger vo Fallyt dien quassle, bezaichnet s Banggghaimnis als uuralts Zepfli und scho dien d Bundesgälder aabebrassle.

Nadyrlig het men alles fescht im Griff uff dämm havarierte, legge, singende Schiff.

To big to fail haisst doo die offiziell Begrindig, wenn aine schyych draut Frooge z schtelle. Und froggsch denn wyter, droot dr aifach d Kindig - vergiss drum besser waas hesch frooge welle. Nadyrlig verhaisse glyy scho all die Ökonoome dr baldig Uffschwung mit Tam-Tam und Läärm - und kunnts denn anderscht uuse, hänn die Gnoome dr Vorschussbonus lengschtens scho am Schäärme. Verluscht losst sich im Bangggeschäft berächne, zeerscht goot Ysland denne Dubai d Schyysgass ab; mit zig-dausig Aarbetsloose mues me rächne, Hauptsach me garniert bim Bonus joo nit z gnabb.

Nadyrlig het men alles fescht im Griff uff dämm havarierte, legge, singende Schiff.

Und mues dr Plebs jetz halt am Hungerdiechli gnaage, dr Giirtel änger schnalle und uff vyyl verzichte, so dien das d Bängger würdig und mit Fassig draage und d Zytige imene Nääbesatz do driiber brichte. Nadyrlig het kain die Gryyse im Voruus kenne aane, wil das im Leerbuech soo nit voorgsee isch. Struggdurierti Fonds leen sich halt nie gnau blaane, lieber ziet men d Kundschaft iiber e Disch. Dr Gwinn fiir d Bängger, dr Verluscht de Kunde, das isch d Doggdryyn vo dääre Banggewält und niemerts waiss, kunnsch iiber d Runde oder verliersch am Schluss dyy ganzes Gäld.

Nadyrlig het men alles fescht im Griff uff dämm havarierte, legge, singende Schiff.

Begränze mecht d Regierig jetz dä Schaade - au wenn me s Staatsvermeege zerscht de Bangge git - dr braavi Schwyzerbiirger darfs elai uusbaade, mir alli zaale fir die Banggeschulde grefftig mit. Dr dummi Biirger kaa me nämmlig ganz guet rupfe per Meerwäärtstyyr und Pensionsaaspruch, me duet em s letschi Neetli uus em Portefeuille zupfe, s Gäld haig jo schyyns kai Aigebruch.

Fir Generazioone länge jetz scho d Schulde, wo me ins Uuferloosi het lo aanewaxe, als braave Biirger mueschs erdulde, au wenn d im Schilf schtoosch bis an d Haxe. Die Ospel-Brieder aber losst men aifach laufe - bi uns syg das halt nummen e Kavaliersdeliggt - die Biidermänner kenne sich esoo verschlaufe und keine wird in d Wieschti gschiggt. Kai Graaie gratzt der andere d Augen uus, kai Heerli duet me dääne Brieder grimme, naai, d Grächtigkeit gseet anderscht uus und duet in däm Fall soo nit stimme. S Volgg foot drumm langsam aaf muure und d Stimmig gheit ganz bletzlig um, e männgge het mit Rächt e frächi Schnuure und fyylt sich nimme glai und dumm. Me forderet Moraal und Aaschtand vo dääne Gselle soo wie s aigedig Bruuch und Sitten isch, doch laider blybts do nur bim „welle“ Wil dr Bängger en anderi Gattig Wääsen isch. **Drum frogt sich s Volgg, hänn die no im Griff uff dämm havarierte, legge, singende Schiff?**

Im Griff hämmer d Ladärne-Usstellig uff em Minschterblatz und uff dr Kasärne d Usstellig vo de Wääge- und Reggwisyte vom Mäntig Zooobe bis am Mittwuch demorge.

www.muggedaetscher.ch